

## Chimborazo - Cazadacuna Quillcachishca - Wives Scriptures

Efesios 5:22-24 Cazadacunaca, Mandaj Jesusta shinallataj paicunapaj quiquin cusacunata cazuchun. 23 Tandanacushca crijcunapajca, Cristoca umami. Chai shinallataj cusapish huarmipajca umami. Crijcunaca Cristopaj cuerpomi, paimi paicunapaj Quishpichij. 24 Tandanacushca crijcuna Cristota cazuj shinallataj, cazadacunapish paicunapaj cusacunata tucuipi cazuchun.

Efesios 5:31,33 Shinallatajmi c'arica, yaya mamata saquishpa, paipaj huarmihuan tandanacunga. Ishqui cashcamanta shujlla aichami tucunga. 33 Chaimanta quiquin c'uyarij shinallataj, paicunapaj quiquin huarmitapish c'uyachun. Huarmipish, paipaj cusata respetachun ninimi.

- 1 Corintios 7:3 Cusaca quiquin huarmiman cuna cashcata cuchun, shinallataj huarmipish quiquin cusaman cuna cashcata cuchun.
- 1 Corintios 7:34 Shinallataj cusayujpish, solterapish ch'ican ch'icanmi. Solteraca cuerpopish, espiritupish jucha illajlla cangapajmi, Mandaj Jesuspajta rurana yuyailla. Ashtahuanpish cusayujca, cusata ima shinapish cushichingapajmi cai pachapi tiyajcuna yuyailla.

Colosenses 3:18 Cazadacuna Mandaj Jesús munashca shina, cancunapaj cusacunata cazuichij.

- 1 Timoteo 2:11-15 Huarmica tucui yachachishcata upajlla uyashpa, tucuita cazuchun. 12 C'arita huarmi yachachij cachun, mandaj cachunca mana mandanichu. Ashtahuanpish upajlla cachun. 13 Puntaca Adantami rurashca carca. Chai q'upami, Evata rurashca. 14 Shinallataj mana Adantachu umashca carca. Ashtahuanpish huarmimi umashca tucushpa, mandashcata p'aquirca. 15 Chaimanta huahuacunayuj tucushpa, crinapi, c'uyaipi, jucha illajyashpa mana maipish cachun causashpaca quishpiringami.

Génesis 3:16 Huarmitapish cashnami nirca: –Chichu cajpipish jatun nanaihuan canatami mirachini. Huachanatapish yallitaj nanaihuanmi huachangui. Chashna cashpapish canca cusahuan canatatajmi munangui. Paimi cantaca mandanga– nircami.

- 1 Pedro 3:1,2 Huarmicuna cancunapaj cusacunata cazuichij. Chashna tucuipi alli cazuj cajpimi, Diospaj Shimita mana crij cusapish huarmi tucuipi alli cajta ricushpaca, mana imata huillajpipish crij tucunga. 2Cancunaca imapi mana juchachipaj, cazuj cajpimi chashnaca crij tucunga.

Tito 2:1-5 Chaimanta imahuan mana chagrushca yachanata canta yachachishca shinallataj yachachingui. 2 Yuyaj c'aricunataca, alli yuyaiyuj, mana pugllarij, yuyaisapa, tucui shunguhuan crij, c'uyaj, mana p'iñarijcuna cachun yachachingui. 3 Yuyaj huarmicunatapish alli cazuj, yangamanta mana juchachij, mana machaj cachun, ashtahanpish allita yachachijcuna cachun yachachingui. 4 Chashna cashpami, chairaj huarmicunataca paicunapaj cusacunata, huahuacunata c'uyaj, 5 alli yuyaiyuj, mapa yuyai illaj, paicunapaj huasipi allicunata ruraj, alli shungu, paicunapaj cusacunatapish cazujcuna canata yachachingacuna. Chashna cajpimi, Taita Diospaj shimica mana c'amishca canga.

Proverbios 12:4 Yuyaisapa c'uyaj huarmica cusapajca, coronata churashca shinami. Ashtahanpish mana alli huarmica, tulluta ismuchij ungüi shinami.

Proverbios 14:1 Yachaisapa huarmica paipaj huasitaca, allimi shayachin. Ashtahanpish rumi shungu huarmica, shayachishca huasitapish paipaj maquihuanmi urmachin.

Proverbios 19:13 Rumi shungu churica, yayapaj shunguta nanachishpallami causan. Caparirishpa rimaricujlla huarmipish, zazan huasipi tamyashca shinami.

Proverbios 21:9,19 Jatun huasipi cashpapish, rimarishpa p'iñachicujlla huarmihuan causanaca jatun llaquimi. Chaipaj randica huasi jahuapi quiquinlla causanarajmi alli. 19 Manchanayajta p'iñarishpa c'amij huarmihuan causanapaj randica, shitashca pambapi quiquinlla causanarajchari alli canman.

Proverbios 25:24 Jatun sumaj huasipi cashpapish, caparirishpa rimaricujlla huarmihuan causanapaj randica, huasi jahuapi quiquinlla causanarajmi alli canman.

Proverbios 27:15,16 Tamya punillacunapi zazan huasipi tiyanahuan, caparishpa rimaricujlla huarmihuan causanahuanca chai shinallataj llaquimi. 16 Chashna huarmita jarcanaca, huairata jarcasha nishca shina, mana cashpaca aceiteta alli maquihuan lutsasha nishca shinami.

Proverbios 31:10-31 Yuyaisapa yachaj huarmitaca, ¿pitaj jahualla japi tucungari? Chashna alli huarmica achij nicuj sumaj rumicunatapish maihuan yalli valijmari. 11 Cusaca paipimi shunguta churan. Paihuanca ima illaj mana causanchu. 12 Paica llaquichinapaj randica, cusa cushicunata rurashpami causan. 13 Millmatapish, linotapish maipipish randishpami, cushicushpa paipaj maquihuan sumajta ahuan. 14 Carumanta sumaj micunacunata randishpami, c'atunacunahuan jatun barco shamuj shina chayamun. 15 Utcata jatarishpami paipaj tucui

familiacunaman caran. Pai huiñachishca huarmicunamanpishmi raquin. 16 Alli allpata ricushpami, paipaj maquihuan ganashca cullquihuan randin. Chai allpapica uvata tarpushpami, alli chagrata ruran. 17 Imata rurangapajpish, sinchi sinchita chumbillishcami purin. Paipaj rigracunapish, mana shaicuj rigracunami. 18 Randishcapish, c'atunapish alli llujshichun ricuranmi. Paipaj lamparapish tutaca rupacunllami. 19 Shuj maquihuanca sijsijta, caishuj maquihuanca puchcana ruedata cuyuchishpa puchcacunllami. 20 Huajchamanpish, ima illajcunamanpish maquita cacharishpami caran. 21 Rasujpipish paipaj huahuacuna chirichinataca mana manchanchu. Paipaj tucui familiamari racu churanacunahuan purin. 22 C'atacunatapish paillatajmari ahuan. Churanacunatapish ashtahuan alli linota ahuashpami, morado sumaj churanacunata churarin. 23 Paipaj cusapish, llajtata mandaj yuyajcunahuan pueblo pungu tandanacuipi tiyarishpaca, tucuicuna rijsinalla runami. 24 Sumaj linsocunata ahuashpami c'atun. C'atushpa randishpa purijmanmari sumaj chumbicunata c'atun. 25 Paipajca imata mana atichij cana, tucuicuna alli nishca canaca, sumaj churanata churarishca shinami. Caya minchatapish paica asinllami. 26 Paica alli yachaihuanmi imatapish shimi llujshin. Llaquij canatami yachachishpa mandan. 27 Huasipi imapish alli cachun ricuranmi. Micunallatapish mana yanga micushpa tiyanchu. 28 Paipaj huahuacuna jatarishpapish, cushicui mamita nincunami. Cusapish cashnami nishpa cushichin: 29 "Achca huarmicunami allita rurancuna. Ashtahuancarin canmari tucuicunata yalli allita ruraj cangui" ninmi. 30 Ñahuilla sumaj cashpaca, inquitanllami. Ricuilla c'uyananqui cashpaca, yangallami. Ashtahuapanpish Mandaj Diosta manchaj huarmimari, tucuicuna alli nishca canga. 31 Paipaj maquihuan trabajashcamantaca, paimanpish allita cutichichigari. Pai imallata rurashcamantaca, pueblo pungupipish alabaichigari.

Pastor T. John Franklin  
Church of Salvation, Healing, and Deliverance  
COS-HAD.org